


Uf  
7960





Uf 7960

20

Biblioteka Jagiellońska



stdr0019667

uf 4960



AMŒNITAS  
LILIORVM

ILLVSTRISSIMI DOMINI

D. NICOLAI PAC

PALATINI TROCENSIS

CAPITANEI KRZYCZEWIENSIS. &c. &c.

repræsentata.

Atque

EIDEM ILLVSTRISSIMO

*In primo Auspicatissimoq.*

*Ad*

PALATINATVM  
TROCENSEM

INGRESSV

SVMMO GRATVLANDI STUDIO

DICATA

*Per me*

STANISLAVM EVSTACHIVM KOSSAKOWSKI.

CASTELLANIDEN MSCISLAVIENSEM.

Auditorem Eloquentiæ in Alma Academia Vilnensi Societatis IESV

Anno Domini M. DC. LII.

VILNÆ Typis Academicis Soc: IESV.







**GENTILITIA LILIA  
ILLVSTRISSIMI PALATINI.**

Clarus vbi monstrat Paciani sanguinis Hortus.  
LILIA, quæ Patriæ non moritura parit:  
Florida odoriferi cedunt viridaria Pæsti,  
Vincuntur Phrygii pulchra rosæta Midæ.  
O culta Heroum fæcundaq; LILIA! florem.  
Nulla quibus similem Chlorydis aula videt.  
Et quæ (nam terram flectuntur versùs & astra)  
Iure ad se terra, ad se simul astra trahunt.



138.5907.

**ILLVSTRISSIMO DOMINO  
D. NICOLAO PAC  
PALATINO TROCENSI,  
CAPITANEO KRZYCZEWIENSI. &c. &c.**



*V*spiciatissimum ad Palatinos Fasces Ingres-  
sum Tuum honoraturus **ILLVSTRIS-  
SIME DOMINE**, Lilia fero, animis  
quam plateis insternendis aptiora: quæ non  
pè silis ductorum à Semiramide ex terris in  
aërem protulit hortorum colonia, sed honor  
Magno Lithuania Ducatui, ceu publico gloriæ inseuit cam-  
po, ad patriæ messem uberem voluptatis. Consueuerat  
suis vetustior Roma Ducibus, quos parva bonis auibus vi-  
ctoria remisit in urbem, sparsos latè per compita flores  
subiicere, gloriosum minùs triumphatrices plantas iter ha-  
bituras rata, nisi substratos flores calcassent. Ita & ego  
Tuo ad Trocensem Palatinum Ingressui, splendido licet  
amicorum comitatu, insigni Equestris Ordinis frequentia,  
propriq; cultu nobili, additâ florentium **LILIORVM  
AMOENITATE**, plus gloriæ accessurum arbitra-  
bar. Liliis his equidem carere non poteris, quæ **PACI-  
ANO** in sanguine, Maiorum gloriosè factis, & propriâ  
nusquam non circumfers virtute: neq; ipsa Lilia, cum Sena-  
torias impleant Curules, primos à Rege coronent Magi-  
stratus, patriamq; recreent vniuersam, calami beneficio, ut in  
publicum delata paterent, indigebat: ea tamen ut Tibi offerre,  
tum Gentilitius, quem communem habemus, sanguis, tum  
litteraria, ad quam hodie informor, imperavit disciplina.  
Non poteram in Honore Tui, amplitudinem mutâ peccare  
taciturnitate, exigente publicam gratulationem Nostro.



anguine, sed neq̃ aliam gratulandi materiem assumere,  
nisi quam idē suggestisset sanguis, Tua scilicet LILIA. Ipsa  
verò eloquentia, ut florida ingentium laudum argumenta  
tantis in Floribus animaduertit, ultro ad suauissimum la-  
borem anhelauit, felicem se admodum arbitrata, si lectos  
artis sue flosculos, Florum Regibus LILIIS, in obsequium  
obtulisset. Equidem immaturam Tyronis dictionem Tuo-  
rum imparem LILIORVM AMOENITATI, um-  
bramq̃ fore, quam cultum potius, non ignoro. Malo tamen  
tenui licet stylo, debitum Tibi affectum aperire, quam  
verecundo silentio Senatoriam vulnerare dignitatem. Um-  
bræ nomen, meo in labore non fugio. Sit sane umbra: LI-  
LIA Tua satis non exprimet, sed efficiet, quod umbra  
proprium est, ut in se, pulchrior gratiorq̃ eorum Amœnitas,  
Glorie nimirum Tuae & Virtutis Imago appareat.

Illustrissimæ Celsitudinis Tux

Obsequiis paratissimus. Frater

STANISLAUS EVSTACHIVS KOSSAKOWSKI

Castellanides Mscislauiensis,

Auditor Eloquentie in Alma Academia

Vilnensi Societatis I E S V.



# AMŒNITAS LILIORVM

ILLVSTRISSIMI DOMINI

D. NICOLAI PAC  
PALATINI TROCENSIS  
CAPITANEI KRZYCZEWIENSIS.



Ngustum se nimis ad exortæ copiam  
lœtitiæ Trocensis queritur Palatinatus,  
dum suis Te conspicuum Fascibus adorat  
Palatinum ILLVstrissime Domine. Effusa  
enim vndeque non capit gaudia, dum eos Tecum  
videt redire Flores, in quibus prospera rediuiuæ felici-  
tatis legat omina. Triste perquam vulnus, Trocensi  
inciderunt fortunæ immatura Illustrissimi Domini PE-  
TRI PAC Palatini Trocensis, Tui, hoc (ita loqui li-  
ceat) in honore prodromi fata: verum Tua digni-  
tas ei felicem adeò suppeditat medelam, vt iam citra  
testem luculentæ plagæ notam, ex integro conualescat.  
Habeat magnus ille cognomento rebusque inter Ro-  
manos præclarè gestis Pompeius eam itineris laudem,  
quod suo transitu, effatæ apud Rhodios quercui florem  
fructusque reddiderit: hoc illustrior tamen Tui ad Tro-  
censes Fasces aduentus gloria, quò nobilius est, non  
rudē

A



rude lignum in florem, sed generosa liberæ nobilitatis pectora, ad lætitiâ animasse. Nullus in circumfuso Equestris Ordinis comitatu reperitur, qui aureum Honoris Tui serenum, caliginosâ tenebræ inuidiâ. Tanta lætorum undique affectuum vltro Tibi substernitur propensio, vt minus vel ebria matutino rore florum familia, vel opulenta plenior spicâ Ceres, pendulis terram saluret uerticibus: nec tantum quiescentis substrato in auro fulgur iaspidis, quanta de Tuo Honore omnium alacritas videatur. Non equidem compositi ad lætitiæ testimonium, ignes, quibus Roma sublimium officiorum exordia venerabatur, artificiosè vrunt tecta, at quiuis debitum Tibi amorem succendit. Sed hoc Gentilitii Floris Tui munus est, qui Palatinatui Trocensi velut Horto nobilissimo secundum insertus, aucti cultus tenacitate pristinos in omnium animis affectus resuscitat. O quam dulce hodie vniuersis PACIANA in præsidium recipere LILIA, quæ non acuto spinarum asperantur horrore, sed dulci, ad Patriæ subditorumque delicias, florent voluptate. Quis felicitatis aut innocentiae vulnera Te pertimescat Præside, cum innoxius Liliorum Tuorum candor omnem fontis iniuriæ expungat aculeum, imo spinas ipsas in Lilia cogat efflorescere. Hæc sunt Illustrissime Domine illa Tua Lilia, quæ à primo ortu, ita sublimes Regum Principumque induere purpuras, vt innati candoris integritatem, nullo texerint fūco: ita natiuo albicant argento, vt ad afflictæ patrociniū innocentiae, fuso (quoties opus est) reorum scelerum rubeant sanguine. Hæc illa Lilia, Florum Reges, Familiarum Decora, pacis bellicque ornamenta, Equestris Ordinis, Senatusque Lithuani lumina. quorum amænitate solâ dum auspiciatum Tuæ dignitatis veneror principium consilii mei rationem, in copiosam Illustrissimæ Domus Tuæ maiestatem deriues, velim. Diues quippe dome-

domesticorum decorum Familia Tua, alieni splendoris opes non admittit, proprioque gloriosa cultu, eam, quæ aliunde venit, gloriam, ceu adsciticia pigmenta iusto spernit supercilio. Arduam sane prouinciam, in explicanda Liliorum Tuorum amænitate suscepi Illustrissime Domine, quæ vt facili nobilem ingressus Tui venustat pompam, ita pariter Eloquentiæ vires premit, ne dicam opprimat. Ecquam enim styli felicitatem ii non vincant flores, qui fortunato plurimum sæculorum labore culti, creuerunt ad eam, vt magnitudinem profunda solum honorare possit admiratio, tantumque à communi recesserunt humilitate, vt relicto ignobilium herbarum consortio, eam occupent celsitudinem, quæ Augusta è vicino tangit fastigia. O amæna, o magnis perpetuò nutrita honoribus Lilia! quem Senatorii locum Ordinis non impleuistis? quam sublimioris officii sedem non coronastis? Non regium modo inter flores nomen, verum & primas, secundum Regem possidere dignitates, Vestræ PACII fortunæ, imo virtutis innatæ est. Patet frequens illa Illustrium Familiarum calamitas, quâ claros Patres infamis posterorum obscurat ignauia. Bonitatem Antonini perniciosus non raro commodus, mille incommodis euerit. Lucem Germanici quoties caliginosus tenebrat Caligula? Nobilitati primis inhiamus omnes desideris, ita tamen ingentium olim Heroum raras cum tabulis proicimus virtutes, vt nobile palatium, nisi à nobilibus vitiis quandoque non habeat nobilitatem. Procul à tanti dedecoris macula Liliata Domus Tua, cuius hæredes iucundâ Liliorum altitudinē, sublimibus ausis domi forisq; æmulantur. Nullus inter vos est Illustrissimus PACII qui purissimum clari sanguinis fontem, ignobilioris uitæ turbet infamiâ. A teneris quippe dum mutuum vos inspicitis, ad dignas maximis Reipub: honoribus virtutes occulto quodam Numine, perpetuæ genit-



genium imitationis vobis inspiratis. Qui fuit Auis, idē in fera Nepotum posteritate, generosus ad ardua viuit impetus, quem nec frequens periculorum affultus, statione; nec temporum vicissitudo, constantiā delicere potest. Flores estis Illustrissimi Heroes, in quibus verius, quā Sybillæ foliis, continuatarum per longissimas ætates virtutum, quicquid evolueret potest oracula; & compendiosius quā in poemate, nuce Homeri clauso celebres Heroum, historias legere. Haberetis vti-  
nam in oculis quā animis posterorum, obtentam grandibus meritis immortalitatem, soli vastam Lithuanæ Curia impleretis capacitatem, Senatum soli faceretis PACIANVM. Quanquam & in ipsa moriendi necessitate, illustre satis Familiae Vestrae decus est, quod extra seculorum arbitrium nullam cum tempore ferat varietatem. Succeditis vobis perpetuo o nobiles surculi, verum nec à vobis, nec à vestra receditis radice; adeoque per diuersas ætates simili frondetis gloria, vt aurei illius rami, aureo vatis commento plantæ cuiusdam inserti elogium in hereditate habeatis.

Vno auulso non deficit alter

Aureus

Magnificas, quibus semper floruitis, virtutes; continuata, quibus altius Patriæ creuistis, merita; ingentes, quas communi bono deuouistis, animas; præclaros, quos ad vsque nostri præsentiam temporis, deduxistis, dignitatum variarum fasces; quotiescunque attonitæ præfigo cogitationi, eodem semper honore Vestra Lilia florere animaduertor. Gloriosa facinora muniaque Vestra, mentem; ceu discolor hortorum Familia multiplici fragrantia humanum oppugnat odoratum. Primus enim gloriæ Vestrae apparatus, in sequentis pulchritudine reuertitur; & noua, in ea prodeunt specie, quasi vetusta sub manu renascerentur. Ornat vos hodie

die præclara in Rempub: merita; porrigunt sæculis raræ virtutes, & insignium animorū egregiæ dotes; Senatorius honor ad certaturam cum æternitate famæ gloriæque vitam disponit: at nonne hoc cultu in Maioribus quoque Vestra Lilia florere? Nondum Lechia Iagelloniam quærebat adoratura purpuram, nondum Augustas Polona Sceptra Lithuani Ducis ambiebant dexteris; iam Vestrae Gentis maiestas per summos apices gradiebatur: iam PACII, Pacis decora, Martis Fulmina, Reipub. Lumina, Equestris Ordinis Præsidia, quotidiana inter encomia audiebatis. Nunquam Illustrissima Domus Vestra sterilis Heroum agnita, ex qua, perenni venerunt successione inuicti Lithuanæ Scipiones, inclyti Metelli, maturi Catones, celeberrimi illi GEORGI, STANISLAI, PETRI, NICOLAI, DOMINICI, PAVLI STEPHANI, & alii tum meritis tum dignitate venerandi PACII. O Heroes! o Lilia! videri profecto citra admirationem; facundia pro dignitate coli non potestis! Quis enim parem afferat orationem integritati GEORGI PAC Palatini Polocensis, qui Podoliæ Iudex tanta moderatione præmia cum poenis dispensabat, vt ad perfectam iustitiæ laudem, nil prorsus in eo Regium Serenissimi Iagellonis examen desideraret? Quis assurgentes pari virtute & Honore Duum viros GEORGIOS PACIOS Palatinos itidem Polocenses laudibus assequatur, in quorum altero prudentiæ vim vniuersa stupuit Polonia, quando ruptam per Polonos cum Lithuanis concordiam nouis fæderibus redintegrabat? NICOLAI PAC Palatini Podlachiæ singularis auctoritas, hilaris munificentia, digna Heroe & planè PACIO fortuna, quamcunque superant panegyrim. Tuam verò o nobile Patriæ propugnaculum STANISLAE PAC Palatine Vitepsensis fortitudinem, quæ æternet eloquentia? Togatæ curæ Tuæ, quas publicis commodis impendi-

B

sti



sti, maiores sunt quam ut integrè pro copia, vel prodignitate splendide satis recenseri possint. Facilius Tibi erat cæsis hostium in pectoribus, cruentos victore gladio ducere characteres, quam scriptorum maximis, parem Tuis factis expedire stylum: minus, Martiâ promptitudine Patriam tueri, quam suadæ Tuorum copiam facinorum in numerum reuocare. Testatur fortunatos Martis Tui progressus aulica Moschouiæ Ducis Legio, Tuis ad Wielizium armis extirpata. Loquitur strenuum dexteræ Tuæ robur trium supra decem millium Moschouiæ exercitus, à Te exigua duorum millium manu, pars deletus, pars in Moschouiam (quæ mox à Te victore & vindice fufis latè visitata incendiis, ad Tui nominis claritatem vnde quaque illuxit) vnde venerat, insigni reiectus damno. Sensit in Te malè ominata Moschorum Avis exitiale suis copiis fulmen, quod vel absens, solâ sui expectatione & famâ, collectas magnorum exercituum vires, in terrorem, turpemque fugam coniiciebat. Obsederat Vitepscum trium è Moschouia Palatinorum barbaries, præteritas vltura (an auctura?) clades, & quia propriam potentiam Tuâ prælagiebat inferiorem virtute, domesticam rabiem, vocatis in belli societatem Tartaris, externâ feritate communiuit. Quid tamen Moschouitica multitudo cum auxiliari Scytharum furore Tuo Marti? quod præcipiti de summis montium iugis torrenti, obuius lapillus; quod eiaculato fulmini, obuia syluæ pinus; quod accenso rogo, stipula. Vix enim in conspectum hostilium armorum processeras, ilicet barbaræ noctuæ ad Martii solis fulgorem caligare, castra deserere, fugæ beneficio turpem patriis in latebris salutem quærere. Et profectò vidisset eâ tempestate Vitepscum verissimam in Moschorum interitu Cannensis cladis imaginem, si hostis Lithuanum Annibalem voluisset præstolari. Nulla quoque  
laus

laus erit tam diserta, quæ amplissima PAVLI & IOANNIS PACIORVM Meislauiensis, & Minscenfis Palatinorum æquet decora, quibus fidele adeo sibi posteritatis memoriâ obstrinxerunt, ut non nisi cum æternitatis fastis, quos Toga Sagoq; impleuerunt, gloriosæ interitum famæ, habere posse censeantur. At Te o Lithuanæ Gentis delictum PETRE PAC Palatine Trocensis quis verborum ornabit cultus? Succumbit omnis Tibi facundia, cum & ipsas, quibus Te Reipublice gratitudo sublimabat, dignitates, Tuam infra virtutem, longo reliqueris intervallo. Singularis in DEum pietas Tua, in Patriam amor, in egestatem munificentia, neque tum extra compendium sunt, quando vel historiam singula, vel pœma nanciscuntur. NICOLAI verò PAC Samogitiæ Antistitis famam, quæ tandem exuent sæcula? Munitior Illustrissimus hic Præsul est contra obliuioni temporis iniuriam, quam ut gloriæ laudisque cladem vereatur. Non finet eum apud secururam obscurari posteritatem clarissima Samogitiæ Insula, cuius lucem, quia destinato in Præules relictus auxit patrimonio, caliginem à se proscriptit vniuersam. Pari fortunâ virtuteq; & vos omnem exquisitæ laudis apparatus extinguitis perennaturi Illustrissimi Vilnenses, Kiouienfes, Vitepsenses, Polocenses, Smolensenses Castellani, M.D. Lithuaniae Pocillatores, Notarii, Referendarii, Vexilliferi, Succamerarii, Procancellarii, Marschali DOMINICI, PAVLI, GEORGII, CHRISTOPHORI IOANNES NICOLAI, STEPHANI PACII ingentes Animæ, Heroes inclyti, Patriæ Columina. Nullus Vobis famæ partorumque metus decorum. Prouidistis abundè copiosis meritis, ne vel odorem Liliorum Vestrorum parta semel deferat gratia, vel colorem inuidæ delibent maculæ. Crescet vobis florida semper posteritas geniali in Horto, quem contra durioris



auræ tempestatumque minas, tanto heroicorum operum præsidio munistis. Cæterum Te Illustrissime Palatine quisquis hodie Liliū Senatoriā videt ruberē purpurā, multum, quod virtuti Tuæ; quod fortunæ gratuletur, multum habet. Præcipuos enim Lithuanorum Procerum fasces, quos alibicāna duntaxat meretur maturitas, citò admodum occupasti, non motò seditiosæ ambitionis tumultu, sed emeritæ suffragio virtutis; quæ ut ingentes radios latius diffunderet, altiore loco debuit collocari. Felix hæc est Illustrissimi PACII ceu Liliorum prærogatiua Vestra, ut purpuram à radice trahatis, ad magna, iam, cum nascimini, destinati. Gloriæ Constantino datum, quod à proprii generis authore fortunam imperii haberet, non fortuitā hominum consensione, neque repentino fauoris euentu princeps factus. An igitur & Tuarum laudum pars erit postrema, quod Senatū virtute & auitā nascendi forte iam intraueris? Magnum bonum PACII Sŷ; hæreditarium est, in lucem felices venire, & quæ cæteris totius vitæ labor vixdum parit, domi statim parta suscipere. Miramur felicitatem, quæ meritis in ordinem stipendiis, ad potentiæ robur inualuit; cultum tamen maiorem debemus iis, qui super longas acquirendæ gloriæ moras à fortuna positi, magni ortūs sublimitate verticem honoris tenent. Plerique dum ad dignitatum apicem eluctantur, singulis prope quiescunt in gradibus, vires ad reliquum iter collecturi. At Tu, omne, quod infra Senatorem, spatium est, vno quasi saltu superasti; ut ad supremum culmen volasse, non ascendisse videaris; tot aliis, quot Maiorum meritis. Non solis tamen Maioribus Illustrissimæ Purpuræ debes beneficium. Contulisti namq; ad eam non humilem priorum facinorum apparatus, quo ostendis, Te non Maiorum duntaxat maiestatem occupare, sed auitum Familiæ splendorem

recen-

recentibus factis promouere. Generosum in Te PACIANÆ Gentis deriuauit natura sanguinem; at Tu non pauca vicissim ei refundis decora, ut genere & virtute Te PACIUM probes. Circumferebat quondam Regum Polonorum decor Kriouustus pendulam de collo defuncti Parentis effigiem, in qua, exactius paterna secuturus intuebatur gesta, quam magistro ex speculo Caligula adscititiā inhumani vultus austeritatem addiscebat. In Te verò quantam virtus Illustrissimi Parentis (à cuius obitu ingestum Respub. necdum satis composuit mœrorem) inuenit æstimationem, cum non collo, sed laudabili vitā paternam gestes imaginem? Transiit alibi tanta ex genitoribus in prolem formæ similitudo, ut in filiis, parentum notetur aspectus. Tibi verò, signante virtute honestas & Senatoriæ vitæ ratio tantopere impressa est, ut Pater in Filio, Senator viuat in Senatore; neque illum dum Te cernimus, excessisse credamus. Quanquam quid eum excessisse dico? qui ita temporum parebat dominio, ut perennitatem ferret; ita caducam vitam instituit, ut faceret immortalem? Quantis ille virtutibus animum, Rempub: meritis, sæcula beneficiis, historiarum monumenta gestis impleuerit, qui non videat, nemo est. Miratur adhucdum fida Lithuanæ Nobilitatis institutrix & obseruatrix Academia raram illius vel in molli annorum flexu gravitatem, quam tantā tenuit constantiā, ut in puero, ea, quam puerilis ætas communem habet, licentia semper exularet. Stupent Olomucium & Bononia clarissima Palladis domicilia, coniunctam in eo cum summo scientiæ desiderio, maximam felicioris ingenii vim, quam eruditis in certaminibus, palma facile cum triumpho sequebatur. Hoc autem quantum decus, quod inter externos diuersatus mores, patriam, quam extulit, retulerit innocentiam? Peregrinationes (inquit morum censor

C

Sene-



Seneca) vt plurimum suscipiuntur vagæ, & littora pererrantur, & modo mari se, modo terrâ experitur semper præsentibus infesta leuitas. Verum cum extra Patriam aliud semper ex alio suscipimus, cum spectacula ex spectaculis curiosi mutamus, fit, vt velut pueri ignota mirantes, ad breue tempus aliquâ detineamur nouitate, & sola mentibus vitia, ceu vestibus puluerem colligamus. Longè alio fructu Illustrissimus Parens Tuus exteris decennium habitauit Prouincias. Non solam illi gentium notitiam, non solas montium formas, aut inulitata camporum spatia, aut irriguas perennibus aquis valles, aut variorum fluminum sub obseruatione naturam, diuturna dedit peregrinatio, sed dignam Lithuano Senatore Rerumpub: peritiâ, & pectus variâ diues cruditio. Redux quippe ductam alibi ætatem, non sumptuosorum itinerum historiâ, non prauarum consuetudinum exemplis, sed instructo ad meliora sanioraque consilia animo, quoties res exigebat, testabatur. Agnouit eum probauitq; Serenissimus Poloniarum Rex SIGISMVNDVS III. (cuius Aulæ collectam apud exteros scientiam statim, redux intulit). Liliū sinceritatis candore, prudentiæ sublimitate, omnium virtutum pulchritudine conspicuum, & Regio dignissimum palatio. Vidit eum stupuitque Liliū militari purpurâ rubicundum Martius campus, in cuius asperitatem, ne solis Aulici horti deliciis assuesceret, voluit transplantari. Secutus namque felices sui Regis Aquilas, tantis ausis & tam generosâ promptitudine Pruthenico, Turcico, Moschouiticoq; bello deuouit sese, vt per ipsa sanguinis dispendia militaris pectoris sinceritatem ostendere Patriæ non dubitaret. Gladio non sinistrè tot bellis vsus, dextram calamo tam dextrè admouit, vt M.D.L. Notarius, heredem Domui suæ scriberet æternitatem, Referendarius M.D.L. quid? Nunquam audita negotia sine inno-

innocentiæ patrociniò, apud Regem Senatumq; deponebat, tantoque veritatem æquitatemque coluit affectu, vt perpetuò tanquam Liliū germinaret: hoc est, [quemadmodum Diuina loquuntur oracula] iustus esset. Spem publicam, quam Liliatum Pii Augusti aurum Imperio Romano ostendit; PACIANA Lilia Populo Lithuano, in Tuo Parente M.D.L. Thesaurario dederunt, hoc gloriâ maiore, quo dedisse aliquid, quàm ostendisse, generosius est. Thesaurum enim ille Patriæ, suæ commissum curæ habuit, at Thesaurus ipse, quo spes publica, commune bonum, Reipub: incolumitas alebatur. Non possunt aurea illius in Patriam latere merita, quæ toties gratissimo sonuerunt tintitu, quoties ad numerum liberalitatis priuatas opes in communem benè prodigus sparsit necessitatem. Excelsa tandem & admodum rara multiplicium virtutum prodigia, quibus non minus immortalitatem sibi, quam data Ciuibus Regum diplomata M.D.L. Procancellarius obsignabat, qui laudum circumscribent cancelli? Nullus sermo tam felix est, qui cum miranda tanti Herois attrectauerit facta, vel numero circumuentus, desperato non stupeat exitu, aut maiestate perstrictus, tantum nitoris habeat, quantum ex rerum luce collegerit. Impar est narrandæ eius magnitudini quæuis eloquentia; at Tua Illustrissime Domine ferendæ par est imitatio. Portas namq; pulchris naturæ dotibus, Patrem Filius; mirâ virtutum similitudine, & officii sublimitate, Senatorem Senator. Portas alter Æneas Anchisen Tuum, non humeris, è Troiani periculis incendi; sed animo, ex præterlabentium temporum insidiis. Qui quidem labor inter prima sanioris ætatis exordia, statim Tibi palmaris fuit. Iis enim coloribus, ad Paternæ virtutis idæam, egregius morum pictor, à teneris vitam Tuam conformabas, vt vera tanti Parentis Imago habereris.



Tantum enim abest, ut visam magnitudinem ignobili quadam abiectioe ad paruitatem depresseris, quin altius laudabili mentis excelsæ genio, per continua pro- uexeris incrementa. Viderit Carthago nouennem Annibalem ante DEos patrios in Romanas iurantem calamitates, non tamen in eo tot signa furoris odii- que in regnatorem orbis populum olim euomendi nota- rit, quot in annorum Tuorum teneritudine Paterni spiritus lineamenta, Vilnensis suspexit Academia. Con- tuleras sub eius disciplinam idoneam studiis ætatem Tuam, humaniore erudiendam litteraturâ, tanto sta- tim profectu, ut Academico in flore Liliū emineres. Artibus namque liberalibus, animi liberalitatem con- iungebas, nunquam laboris, nunquam solitarum par- cus exercitationum; turpe ratus, si ea neglectis in litte- ris amitteres lumina; quæ nobilibus radiis gratissi- mum conciliant splendorem. Hinc etiam erat, quod omnibus optatam Tuæ familiaritatis indulgentiam sub- traheres, qui cum ruditate pectoris vacuum sapientiâ Academici circumferunt nomen, eorum duntaxat a- micus & fautor, quos pertinax ignorantia vincendæ conatus, ad Tui similitudinem ingenii promouisset. Memorant adhuc singulæ, quas quotannis nouâ luce illustrabas, palæstræ, dignam nobili sanguine diligen- tiam Tuam; mirantur viuum omnis honestatis exem- plar, non vni duntaxat gymnasio, sed toti veneran- dum Vniuersitati. Nil vnquam apud Te potuit damna- ta vitiorum facundia, cui subito velut Octavianus obstrepentibus in auito suburbio ranis, silentium impe- rabas: ne præpedito sanæ rationis usu, ea committe- res, quæ diuturna egerent pœnitundine. Inuisa Tibi fuit libertas, quæ nobilem in consortio non habuit mo- destiam, onerosa nimium leuitas, quæ debitam oppri- meret grauitatem. Scilicet ut grandior monstrosas o- lim variorum capiteum Hydras nouus Hercules prote-  
reres,

reres, minorum anguium cæde, vires à teneris glori- ose præparabas. Non nostra modò hæc, verum & ce- lebrum per Germanias Academiæ confessio est, in quibus tanto Lithuanam indolem probasti plausu, ut fateri cogerentur, non eodem Sarmatarum iudicia, quo corpora stupere gelu. Ingolstadium nobilissimum illud Angeli stadium ingressus, quanto ardore, quantâ promptitudine decurristi? Nullam Sapiencia præfi- xit metam, quam ingenii solertiâ prior non attingeres, solâ Te sequentibus æmulis admiratione. Louanium verò Belgii oculus, Arx ingeniorum, Musarum sedes, scientiarum patria vidit in Te Lithuano Iuene, quod in matura superet senectute; sublime nimirum ingeni- um, morum constantia; raram prudentiam vitæ iunctam integritati. Vidit & inuidit capacem cuius- vis eruditionis auiditatem, quæ aded ultra commu- nes eminebat terminos, ut omnem doctrinæ celsitudi- nem pro limine habere videretur. Sunt non rarò qui a- lieno sub sole, aureos riuos nisi in virtutis exitium non deriuant, patriamque reduces enecturi innocentiam, damnata quouis loco vitæ licentioris imbibunt toxica. Fructus iis effusorum largè sumptuum maximus est, magnificis impendiis breuissimam authoritatem lu- crari, & per pretiosa thesaurorum damna exteram obtinere adulationem. At Tu Illustrissime Domine obseruatorem inter externos vbique gerebas animum, ut notatos bonarum consuetudinum morumq; radios, in Tuæ lucis augmentum transferres. Sat equidem decorum Virtus & Fortuna PACIANO cum Flore in Te congefferat, nec foris venustatem quærere ha- bebas opus, quâ domi abundabas; nobilioris tamen a- nimi negotium arbitrabaris, non modò nasci, verum & fieri optimum. Nunquam potentia dignitatie ostentandæ Tua studebat liberalitas, omnium tamen cultus & opinio Te comitabatur, eo quod perpetuò  
D inter



inter Sapientiæ auctores versarere, apud quos animum Senatoriis muneribus aptabas, dum quæsitâ disceres, nondum inuenta sedulus vestigares. Nullus omnino accessus noxiis ad Te patebat commerciis. Quisquis Liliorum Tuorum candori maculam inspersurus putabatur, eum à Tua consuetudine protinus amovebas, dogma secutus Senecæ: si velis vitiis exui, longè à vitiis exemplis recedendum est. Hæret namq; animis in avaro sordidoque conuictu, turpis auaritia; crescit cum superbis tumor, sæuitia in tortorum contubernio non extinguitur, vt nec inhonesta in lenonum sodalitiis flamma. Pari integritate relata ab exteris in Regiam Serenissimi VLADISLAI IV. Lilia Tua custodiisti. In aula namq; (o prodigium!) nil de aulicis contraxere nœuis. Continuum Te sui fecerat Augustæ fauor maiestatis, non tamen inflauit; cum plerumque indiscreta feliciū pedissequa sit superbia, & vix cuiquam contingat, abundare fortunâ, & indigere arrogantia. Nunquam Te Regiæ lubricum extra semitam honesti vidit exerrare, imò suspexit miram animi sublimitatem, quam virtutis regulæ tam exactè conformabas, vt ad inopiam veritatis redigeres Poëtam canentem. Exeat aula.

Qui cupit esse pius.  
Nunquam tibi voluptas cum temeritate, dulces iuuenum pestes, vicinæ, sed nec hospites erant. Ita corpus animo, animum virtuti, virtutem vbique DEO subiciebas, vt quemuis locum honesti sacrarium esse posse, si rector foret voluntas; proprio probares exemplo. Ita inter aulæ tropicos cum erraticis sideribus versabare, vt in constantiam nunquam delinqueres. Regalis aulæ decus, ne splendoris defectu violares, ingens Te famulitii comitabatur ordo; ne tamen externo corporis cultu inglorius vilesceret animus, nunquam sine virtutum choragio procedebas. Quisquamne

quamne igitur immeritum Senatoriæ Te crediderit litare gloriæ, cui per tot heroicarum virtutum initatus es mysteria? Debebant utiq; Lilia Tua Augustam maiestatem coronatura, Senatorio illigari ferto, quorum candor, pridem Te istorum Fascium optimum fecit Candidatum. Non privati hæc iudicii temeritas est, verum publica nobilissimorum confessio districtuum, qui certiore pridem omine Senatoriam Tibi dignitatem, quàm viso quondam Mario consulum Scipio, designabant. Etenim aptos Tibi sustinendis Regni curis non poterant non fateri humeros, quibus toties imposita singulorum districtuum negotia non infelicitè incubuissent. Ibas non raro publicus Tuæ Gentis Legatus ad conuocata Reip: comitia, in quibus pro communis defensione boni, alios quidem (vt dicunt) rosas, Te Lilia, sensu sublimia, cultu decorata, veritate candida omnibus amæna, vni duntaxat, quod damnabas, sceleri ingrata, locutum non ignoramus. Pendebat ab ore Tuo prudentis admiratione faciendi detenta non semel Curia, gaudebatq; nobilissimos PACIANÆ Domus in Te reuixisse Heroes, GEORGIVM scilicet PACIVM à Casimiro Jagellonida sub coronarium Polonorum aurum ituro ad congregatos Regni Proceres, & NICOLAVM PACIVM Præfectum Lidensem ab vniuersis Lithuanicæ Ordinibus, pro deferendis Casimiro Jagellonidæ M.D.L. fascibus, ad Polona itidem comitia expeditos Oratores, qui tantâ vi perorârunt, vt æternitatem sua commouerint ad obsequia, tantâ laude, vt per ora posterorum semper sint ituri. Sunt ea quandoque capita, quæ vbi emendicatam alieni calami facundiam effuderunt, vltra nec verba verbis, nec responsa responsis diluunt, sed muto quodam & sedentario stupore excipiunt singula, & alienis, quas ignorantia non finit improbare, etiam inuiti annuunt opinionibus. Tu verò Illustris-



sime Domine; seu primus censes, seu priori succederes, parem semper ornatum & copiam afferre, neque disertè minus noxiis resistere sententiis, quam viles probare didicisti: imò ea Tuæ felicitas eloquentiæ sæpe fuit, vt velut catenato Herculis auro in Tui sensus comprobationem, ordines traheret vniuersos. Libertatem verò dicendi quis in Te non stupeat, cum nec potentiam delinquentem tacita prætergrediat? Nouimus quantà nuper contentione ac constantia, coram vniuersa Republica violatæ contemptum religionis, legumque patriarum irreuerentiam accusaris. Quæcunq; Tecum pro Reipub. commodis, ingenuè profers, vel hinc PACIANI sanguinis agnoscendus hæres, quòd natium Liliorum Tuorum candorem, nec adulatione, nec veritatis offendas silentio. Exhibuisti abundè nuper generosam pectoris Tui sinceritatem inter prima Minscensium Commissariorum capita, quando debita militi stipendia persoluebantur. Ita namque Patriæ, ita militum bono studebas, vt publicam, quam distribuebas, pecuniam Tuæ religionis æquitatē consecrares. Nullæ Tibi fraudem obiciebant querelæ. Tantam integritatem in distribuendo Reipub. thesauro adhibuisti, quantà Illustrissimus Parens Tuus in eodem vsus est olim ampliando. Adamantem voluit antiquitas iudicem, an vt calcatis aureis affectibus ferreæ iustitiæ adhæreret? Vidit Te talem Minscum, probauit Miles, sensit Patria. Vniuersa namque negotia eâ æquitatis laude Commissarius peregisti, vt Lithuanus Aristides, incorruptus Recti Iustiq; cultor palam audires. Sed en aliud Virtutis fortunæque Tuæ prodigium! Minscensibus attendis iudiciis, Krzyzewianam nihilominus citra Patriæ damnum auertis, & serenas tempestatem. Præsumpserat præsentium rebellio temporum post depositum alibi prosperæ crudelitatis tyrocinium immensissima


nissima, scelerato, quod in reliquas Patriæ strinxit vrbes, ferro, mandatam Tuo præsidio tentare Krzyzewiam. At quo euentu? Risit rusticam incolumis arx obsidionem; risit hostilem insolentiam Krzyzewia Tuis defensa curis, munita armis & consiliis. Clamabat non vnus [ & ii potissimum, quos aut Romanæ Religionis, aut Polonæ Gentis odium, in Cosacorum partes traxerat ] admotis castro rebellium telis: Annibal ad portas. Sed Te Præsides, quid aduersi proficerent conatus? Non equidem præsentem Tua Te habuit Sparta Laconem, vtpote Minscensi à Repub. distentum Tribunali; attamen vel absenti fortuna debuit ancillari. Eâ quippe commeatus copiâ, eo militum delectu locum munieras, vt ad quemuis hostium impetum sustinendum frangendumq; sufficeret. Iteratò aggressus hostis Krzyzewiam, iteratò reiectus abiit, nullo, præter copiosa temeritatis damna, emolumento. Alibi verò quantam Martiæ fortitudinis collegeris opinionem, publica nobilissimorum Palatinatum iudicia attestantur. Vidimus nuper per vniuersam latè Patriam communes in rusticam insolentiam legi turmas, sed Te pariter scriptæ à Palatinatu Vilnensi, Trocensi, Minscensi, Vitepscensi, Lidenfiq; Capitaneatu, militiae Caput, magni Lithuanorum Exercitus Ducis decreto destinatum, non sine debita accepimus hilaritate. Præclara hæc, non tamen postrema Martii pectoris Tui testimonia. Etenim vt verum Te Patriæ amatorem luculentius manifestares, animum ad altiora Reipub. commoda gloriosius erexisti. Eximia publicam in fortunam liberalitas est; seipsum communi bono impendisse exiguum Tu tamen eam & infra Tui magnitudinem animi ponebas, nisi Te, Tuâq; simul, pro publica salute deuoueres. Habuisti itaque in Reipub. tutelam, tres lectissimorum militum cohortes, quibus, ne præter defensæ incolumita-

E tis



tis beneficium, quidquam deberet Patria, Tu sponte  
 proprios in stipendium effudisti thesauros, veteris ora-  
 culi nouo secutus exemplo sententiam, quæ pectus fer-  
 reum in hostes, & argentea simul tela, ad victoriæ  
 certitudinē suavit vſurpanda. Etenim non splendide mi-  
 nus ad maiestatem, quàm fortiter ad impetum milita-  
 re tum censemur, quando iunctis auri ferrique viri-  
 bus, maius in robur & decus vtimur. Multa, quæ ex Te  
 sumpta, Tua commendent Lilia, omitto. Nam vt plu-  
 rima dixerò, in Tuis laudibus vix dicenti similis erò:  
 & quanta qualia porrexero elogia, prope silentium ha-  
 bebantur. Sufficiet itaque in honoris Tui sacrarium,  
 hunc modò ingenii censum deposuisse: in quo, quoti-  
 es Liliorum Tuorum amœnitatem attenta voluet con-  
 sideratio, toties Tuam Tuorumq; virtutem clarissimo  
 cum sanguine venerabitur. Effecisti profectò Illustrissi-  
 me Domine ne vacuum Te meritis concessa acciperet  
 Prouincia. Magnum & in Lithuana Gente primum  
 prope honorem adeptus es, sed magnarum impendio  
 virtutum. Progredere itaq; fortunatis auibus, con-  
 scende debitum Tibi culmen, occupa Trocenses Fa-  
 sces, qui à Tuorum præsentia Liliorum, amœnam  
 haud dubiè efflorescent in hilaritatem. Quidni hodie  
 Trocensis Palatinatus nouis abundet gaudiis, cum ei  
 subicitur Præfidi, qui non à sola nascendi felicitate su-  
 blimis Purpuræ accepit suffragium, sed propriâ quoq;  
 virtute, & heroicis facinoribus altissima fastigia prome-  
 retur? Nusquam hætenus optata non floruit fausti-  
 tas, vbi inclyta Illustrissimæ Domus Tuæ floruerunt  
 Lilia: vtique & Trocensis terra parem in iis fortunam  
 experietur? Nil Te humile euectus tot sæculorum la-  
 bore sanguis cogitare; nil non perfectum, virtus om-  
 nibus absoluta, numeris aggredi finet. Exhibebis  
 Te Lilium omnibus odore, simul & colore peramænum,  
 Lilium inquam, Equestri in ordine, gratiâ; in Proce-  
 rum

rum numero, eximiâ floridum auctoritate. Terra  
 Tuq; commissa regimini agnoscat Te amabitq; PACI-  
 VM, publicæ pacis conseruatorem, non turbulento  
 motu, nec oppressæ iniuriâ libertatis, sed placidâ qui-  
 ere, prudentibusq; consiliis gubernantem. Hæc vni-  
 uersorum de Te auguria, quæ vt propitius cœlorum  
 favor dignis Tuo genere & virtute coronet successi-  
 bus, cum Alma Vniuersitate Vilnensi, quæ  
 quanta quanta est, Tuis applaudit in-  
 signibus, opto voueoq;




E. AMÆ:



# AMŒNITAS LILIORVM ILLVSTRISSIMI PALATINI IN FLORE.

ORbi nil stabile. Omnia  
Velox præcipiti fors rotat impetu.  
Vndis blanda silentibus  
Iam Neptunus habet flustra, nec horridos  
Eurorum patitur greges,  
Admixtus rapidis iam redit Africus,  
Cauris, & vaga Therydos  
Concurrunt pauidis æquora præliis.  
Nox cum luce vices gerunt  
Alternas. Roseum nunc caput aureo  
Sol diffundit in æthere:  
Nunc mitem Hesperio fonte lauat comam.  
Siccâ quos recreat face  
Getuli facies ignea fideris  
Campos, mæsta fluentibus  
Mox rodunt pluuiis astra, & Oriona  
Tellus è madido pauet  
Stillantem riguis aëre fontibus.  
Blandi delictiosa nunc  
Vernis cum Zephyris aura Fauonii  
Canis frigida montibus  
Solvit vincula, magnæ vt pateat via  
Matri, de gremio suas  
Quà diffundat opes, quaque auidis placens.  
Tempe-

Tempestat segetum horreis  
Exundet, grauidas & Ceres aurea  
Spicas, Floraque amabiles  
Verni delicias temporis explicet:  
Nunc rursus viridantium  
Hortorum nitidam bruma superbiam  
Narcissum, & casiam, & leui  
Tymbram cum viola, bellium &, & crocum  
Reginamque Rosam, & Duces  
Et Reges placidæ Lilia Chlorydis  
Lætatur niueo redux  
Oppressisse iugo. Sed PACIÆ Domus  
Sublimi Procerum situ,  
Inter Purpureæ lumina gloriæ  
Summis inclyta honoribus  
Vernant perpetuum LILIA. Nulla eis  
Frontis gratiam eburneæ  
Formosamque comam, aut prælia, quæ mouet  
Sæui exercitus Æoli,  
Aut, quos dura creant sidera, turbines,  
Aut tristes Hyadum minæ,  
Possunt ingentem euellere gloriam.  
Nil mortale perennibus  
Includunt foliis, nil violabile.  
Nec mirum: ad placidas faces  
Heroum, ad Patrii sidera sanguinis,  
Virtutemque domesticam,  
Ceu claram rutili lampada Cynthii,  
Hortis in genialibus  
Crescunt, nobile ver semper habentia.





# AMŒNITAS LILIORVM ILLVSTRISSIMI PALATINI IN CANDORE.

**P**ortenta rerum! Trux Borealibus  
Hyems procellis sæuit, & horridas  
Induta nubes bruma, terram  
Arctat Hyperboreo furore,  
Amœna pulchro cerno tamen super  
Florere thyrsis Lilia, Lilia  
Circum niuoso fusa lacte  
Atque ebore alba magis vetusto.  
An, quos relictâ magna Semiramis  
Telluræ celsum vexit in æera,  
Horti, nitentibus morantur  
Attonitos oculos ligustris?  
Aberro! Flores Littaliæ inclyti  
Colore nativo placidum albicant,  
Argenteo brumæ capillo  
Et niueis similes pruinis.  
Hæc PACIANÆ LILIA sunt DOMVS,  
Candore nunquam non Patriæ agnita,  
Quæ nulla tempestas, procella  
Nulla potest vitare. Auitæ  
Sinceritatis rebus in omnibus  
Florem tuentur. Nullus eis color  
A publicis bonis abhorrens,  
Noxius aut patriæ saluti.

Roma.

Romana seris Musa nepotibus  
Docto loquatur carmine Curtios,  
Scæuasque Regulosque natos  
Pro Patria bene stare ciues:  
Heroas haud Respublica Littauum  
In PACIANO sanguine dispares  
Experta, proferente semper  
Flore sibi similem colorem

Fidelitatis. Sive Senatui hæc  
Inserta crines LILIA Principes  
Ambire gaudent; seu Sigillo,  
Vt meritos solident honores,  
Præesse Regni: seu quoque bellicos  
Inter labores crescere Martio.  
In campo; vbique concolore  
Pro Patria folio nitescent.  
Non hæc molestæ LILIA ciuium  
Turpant querelæ, non odii notæ  
Sed dulce Gentis vniuersæ  
Delicium sine labe candent.

O Hortulanis LILIA Gratiis  
Plantata! Flores ô nris æmuli!  
O quæ virentes inter herbas  
Liligeris redimita sacram  
Frontem coronis, imperium tenes  
Perenne florum, Præses & aurei  
Regina veris, PACIANA,  
Fac stabili vigeant nitore,  
Quos glorioso stemmate tert Domus  
FLORES, furentem fac procul Africum,  
Vt Patrio nunquam impediti  
Commodius foueantur Horto.

F2


AMOE.



AMŒNITAS  
LILIORVM  
ILLVSTRISSIMI PALATINI  
IN ODORE.

Frustra Niliaci gleba ferax soli  
Floræ diuitias iactat amabiles  
Frustra Thessaliæ plena superbiunt  
Herbis prata virentibus.  
Hortorum roseo dulcis anhelitu  
Ecquid culta tumet Creta Parens Iouis?  
Totam Flos PACIVS per Patriam magè  
Gratis fertur odoribus.  
Seu me belligeræ Vistula Lechicæ,  
Quæ se præcipitem sponte dedit vado  
Audax Venda mori, ne fieret iocus  
Et cæcæ opprobrium Deæ:  
Seu Thusci reuocent regna Palæmonis,  
Quæ velox bifido nomina lubricis  
Vilnæ gurgitibus Vilis surripit  
Vndis grandior additis:  
Seu me Chronus habet, quæ glacie super  
Hostili rubuit sanguine decolor  
Cum vis Littaliæ dura minacium  
Fregit pectora Teuthonum;  
Optato Patriæ non sine gaudio,  
Diffundi placidis vndique odoribus,  
Per Pacis titulos, perque decus Togæ,  
Perque insignia Præsulum;  
Aduerto

Aduerto PACII LILIA sanguinis.  
Nec tantum hospes eis deciduus breui  
Est Virtutis Odor, sed benè fixus, &  
Cuius semper & incola.  
Cæco euerfa labant sæcula turbine.  
Terræ perniciēs quotidie est noua.  
Mundus funeribus prima stupet nouis  
Vsque excrescere funera.  
Seu Ars, siue ferax clara opera extulit  
Naturæ ingenium, stant modicum: quoad  
Secum Fata, truces & Furia sacra  
Collusere per otia.  
Ætati at dominæ cedere nescia  
Persistunt PACII LILIA nominis,  
Rerumque assidua in clade ruentium  
Spectant exitium integra.  
Qualis flauicomis emicat ignibus  
Intermixta choris Cynthia siderum,  
Cum fulgens tacita nocte volubiles  
Cancer præcipitat domos.  
Talis Sarmaticis nata Trionibus  
Consurgit PACII gloria LILLI  
Semper vere nouo florida, maximis  
Semper diues odoribus.  
Cesset iam tepidi cura Fauonii  
Hortos indigenis pingere floribus,  
Nardorumq; niuem, & sanguineos rosæ  
Clausum spargere per nemo  
Crines. E PACIIS sufficiens venit  
Toti Littaliæ gratia LILLIS.  
Flos hic, delicias & decus, vnicus  
Florum continet omnium.



AMOË.



AMŒNITAS  
LILIORVM  
ILLVSTRISSIMI PALATINI.

IN MARTIO CAMPO.

SI quem cruenti sudor acinacis,  
Mistusq; sævis umbo tonitruis,  
Et dira clades, & seueri  
Tela iuuant furibunda Martis,  
Hostem quietæ pacis, & otii  
Osorem honestu, prælia præliis,  
Irasque lætum iungere iris,  
Indomitæq; animo efferato  
Portare cædes: hunc ego dixerim  
Inauspicatis Acrocerauniis  
Conceptum, inhospitæque Scyllæ  
Terribili malè natum in antro,  
Parthæq; sæuo Tygridis vberè  
Pastum, nepotem sanguinei, plaga  
Getula quem parit, Leonis  
Aut Lybici fera lustra regni.  
At bellicosæ nescia adoreæ  
Quo Musa tendis? desine Martia  
Torquere corda, desine vltra in  
Bella alacres grauiore cantu  
Ferire Celtas. Ergone desides  
Vertemus æuum? Sarmata nobiles  
Præsumet audebitque mente  
Degeneri scelerare Patrum

Segni

Segnis triumphos? Currite Martiis  
Amica bellis currite sæcula,  
Addisce tela, addisce ferrum  
Leche agili bene ferre dextrâ.  
Quid cerno? quid? vel Lilia bellicis  
Crescunt in armis? quæ noua? cernite  
Respersa consurgunt rubenti  
Lilia (prodigium!) cruore.  
Sed PACIANI Stemmatis inclyta  
Nobis videntur LILIA, quæ cruor  
Moschiq; Turcarumque fusus  
Tingit, & è Gothicis abundè  
Educta turmis copia sanguinis  
Gratum colorat. Vidi ego non semel  
In Littauas effusa terras  
Agmina, quæ PACII labores  
Eliberatæ non sine Patriæ  
Fudere fructu: vidi & in hostium  
Castris tumultus barbarorum,  
Præcipitemq; fugam, metumq;, &  
Dispersa turpi spicula dextrâ,  
Arcusque, & enses, & vacuas sine  
Telis pharetras, hinc & inde  
Per rubeos iacuisse campos:  
Quando STANISLAUS PACIVS trucis  
Coniuncta Moschis robora perfidis  
Scythæ, potentum Littalorum  
Vindicibus cohibebat armis.  
Mordens Vitepsci littora garrulis  
Dic Duna lymphis, dicite gurgites  
Vidblauiani, quot reuulsa  
Cum mutilis simul ora truncis.  
Fundi voracis viscera in intima  
Pertraxeratis? quotque cadauera

G 2

Portata



Portata defluxere pronis  
Fontibus, expositura fausti  
Trophæa belli, quo PACIVS bene  
Hostem ultus, amplas tergemini simul  
Fregit Palatini phalanges.  
Wielizii ut maduere colles  
Tincti rebellis sanguine Moscæ,  
Magni cohortem cum Ducis aulicam  
Virtute dexteraque forti  
Fulmineisque agitavit hastis  
Iam vos Smolensco dicite montium  
Affusa circum culmina, perfidi  
Quantum cruoris imbibistis,  
Præsides cum PACIO Arcis, hostis  
Tentare fortunam ausus, inanibus  
Votis recessit, clade suam novâ  
Præsumptionem serò lugens;  
Nil Patriâ, nihil Arce saluâ  
Ferente damni. Cætera quis satis  
Canet disertis prælia carmine,  
Et fusa per campos fluenta  
Quo PACII rubuere Flores?  
O ergo faustum crescite LILIA,  
In barbarorum crescite sanguine,  
Rubete Flores auspici,  
Littalicæ decora alta terræ.





Staats-  
Bibliothek  
19. 4. 27  
Reparatur



